

**Date – 22/11/2025**  
**Time - 7:30 -7:40 Hrs**  
**AKASHVANI AIZAWL**

## REGIONAL NEWS BULLETIN

### HEADLINES (MORNING)

1. **ZORO chuan Sorkar laipui, Ministry of Home Affairs in Indo- Myanmar inrinaah 'Daidanna bang' sak tuma hma a la mek chu a hlawhtlin loh nan nasa taka dodal an tum thu an puang nawn.**
2. **Champhai District a Farkawn khaw rama mi Lurhtlang Vavu Sanctuary chu nimin khan hawn a ni.**
3. **Sawrkar laipui chuan nimin khan inhlawhfate tana dan thar labour code chu hman turin a puang.**
4. **Prime Minister Narendra Modia chuan ni thum awh G20 Leaders Summit hmang turin nizan khan South Africa Khawpui Johannesburg a thleng.**

<><><>

### ZORO

**Zo Re-Unification Organisation (ZORo) chuan Sorkar laipui, Ministry of Home Affairs in Indo- Myanmar inrinaah 'Daidanna bang' (Border Fencing) siam tuma hma a la mek chu a hlawhtlin loh nan nasa taka dodal an tum thu an puang nawn.**

**Nimin khan ZORO hian Aizawl Press Club-ah thuthar thehdarhtute kawmin, he daidanna bang hian unau, thlahtu thuhmun, thisen inzawm Zofate chu India Sorkarin thendarh tir a tumnaa an ngaih thu an sawi a, ZORO chuan border fencing, hi ngun takin a zirchiang a, Zofate tan a that lohzia thahnem tak an hmuh thu an sawi a, Mizoram leilung thahnem tak chan a ni dawn a, ramri atangin Yard 150 vela a hungna siam tur a ni a, ramri hrul a cheng thahnem tak ei leh bar zawna a tla chhe nghal dawn a, chhungkaw thahnem tak mangangin a siam dawn a ni, an ti. Hei hi a chianna chu Indo-Bangladesh border fencing kalpui mek hian Mizoram pawnah khaw 12 a hung chhuak a, khawlai tan tlang khaw 3 a awm bawk a, hmun thenkhatah phei chuan KM 1 dawn a hlaah te fencing hi siam a nih thu an sawi.**

**ZORO Vice President L Ramdinliana Renthlei sawi danin, Mizoram State ah India sorkarin border fencing kalpui tura hma a rawn lak tirh khan Sorkar leh NGO hrang hrangin an dodal vek a, sorkar pawh a tim deuh niin a hriat a mahse hun an kal deuh a dodalna a nep tak deuh avangin kalpui tan a ni a. Mizoram ramri dep District thenkhatah phei chuan survey pawh neih zawh tawh a ni.**

<><><>

### LADC CAMPAIGN

**December Ni 3 a inthlang tur Lai Autonomous District Council ah Political Party ten campaign beihpui an thlak tan a,**

Nimin khan Areopagy, Lawngtlai Bazar-ah ZPM Lai District Headquarters huaihawt campaign khuhhawnaah ZPM leader, Chief Minister Pu Lalduhoma chuan thu a sawi a, Lairam chuan hmangaihtu dik a mamawh a, chumi atan chuan ZPM chuan mi tha nia an hriat te an rawn chhawp chhuak a ni, a ti. Chhim lam chu ZPM-in a ngaihsak em em a, Mizoram pual liau liau Lunglei-ah State University an din dawn a ti a. Hmasawna hrang hrang hnathawh awm turah district council hruaitute an pawimawh dawn a, state sorkar nen tha taka thawk thei thlang turin Lai mipuite rilru fim pu turin a ngen tih a sawi.

Minister Pu Lalthansanga leh Pu Vanlalruata te pawh campaign khuhhawnaah hian an tel a, Agriculture Minister Pu PC Vanlalruata chuan an sorkar hnuah Mizoram tan thil tam tak kan ti tawh a, Sawhthing pawh a rate chhiat ber kumah pawh kuthnathawk tute hnenah kg 1 cheng 50-in an lei a, chutiingin Hmunphiah te an lei a, kum tharah pawh sawhthing leh hmunphiah grade siam lovin sorkarin a lei dawn a ni a ti. Focus 2.0 atangin hma kan la dawn a, kuthnathawktute thleng pha hmasawna a thleng mawlh mawlh mek a ni a ti.

ZPM sorkarah chuan sawrkarna ngelnghet an tiam tih sawiin MNF leh Congress-ten thawhdun an tum a, hei hian a entir chu sawrkar ngelnghet lo an siam dawn tih a ni a ti a. Lai mipuite tan sorkar inthlak reng chu a khamawm tawh a, Lai ram mipuite nuihzata siamtute hi thlan tlin tawh tur a ni lo a ti a ni.

Ningani khan Aeropagy ah hian MNF Party pawhin campaign an lo hawng tawh a, an party President Pu Zoramthanga chuan thusawiin LADC sawrkar mumal lo taka kal thin chu pawh a tih thu sawiin, mumal taka a kal theihna turin December Ni 3 a mipui ten Vote an thlak turah, MNF Candidate te thlang vek turin Lairam mipuite a sawm a. MNF Party ah mipui ten rinna an nghat tih lanna Dampa By-Election a Vote 500 chuanga an hnehna chuan a tilang tih sawiin, LADC ah pawh MNF Party chuan Sawrkarna an chang ngei dawn ani ati bawk.

ZPM Party chuan an Hqrs atangin an tuilo an awpkeu nasa lutuk chu an buai a, an chaw duhzawng in anglo avangin an darh mek a ti a, LADC Inthlanpui neih turah pawh Candidate ah an buai hle a, hei hian enge a rawn thlen dawn en zel zui a ni ang a ti.

Pu Zoramthanga chuan ZPM chu an sawrkar phat atangin Lengpui Airport chu Sipai kuta pek ringawt an buaipui a, Article 371 'A' ah ram neitu nihna leh chumi a thuneihna a nei a, Autonomous District Council chu 6th Scheduled hnuaiyah ram neitu nihna pek an ni a, he thuneihna hi Aizawl atanga State Sawrkarin a chhuhsak a, pawng lak ngawt theih anilo a, chumi nemngheh nan chuan Article 371 'G' ah Mizoram pumpui huapin a ram neitu ten rem an tihna lo chuan tuman, India Parliament pawhin a khawih thei lo ang tiin a rawn nemngheh thlap ani ati a, tunah erawh chuan ZPM Sawrkar chuan heng thuneihna te hi hlip vekin, hnamdang hnenah a chahbi a pe a, an ngaw neih tha zawng zawngte, Phawngpui National Park thlengin, Central Sawrkarin Defence atan an mamawh an tih chuan District Council in sawi theih engmah anei dawn tawh lo a ti a, FCAA ZPM Sawrkain a pawm ta mai hi a pawh em em ani ati.



## VAVU SANCTUARY

Farkawn Village Council, All NGO Farkawn leh Conservation Mizoram te hmalakna a din, Champhai District a Lurhtlang Vavu Sanctuary, Farkawn khaw rama mi chu nimin khan Champhai DFO Pu Lalbiakchaman Lurh tlangah a hawng.

Vavu Sanctuary hawna inkhawm, Farkawn VCP Pu Lawmzuala kaihhruaiah hian thu sawiin Champhai DFO Pu Lalbiakchama IFS chuan Vavu pawimawhna te, Mizoram State Bird a nihna leh kan ram a an tlem tawh ziate sawiin Community Sanctuary te siama humhalh a tul zia sawiin Farkawn khawtlang tangrualin a humhalhna tur an siam avangin lawmthu a sawi a, kan ram thing leh mau, ramngaw leh a chhunga cheng nungchate humhalhna kawnga hma la sauh sauh turin kalkhawm mipuite chu a sawm a ni.

Lurh tlangah hian Mizoram State Bird Vavu hi an la awm nual nia hriat a niin Kumin May - September inkara an chhinchhiah theih zat chu hetiang hi a ni a,

Vavu puitling hi 20, a pa-8 leh a Nu 12 bakah a note 8 an awm a, Sava tlem, mang mai hlauhawm a nih avangin ven uluk a ngai hle a ni.

Lurh tlang Vavu sanctuary, Farkawn hi sanctuary managing Committee ten mumal taka enkawl turin ruahmanna siam a nih bakah inkaihhruaia fel tk siam a ni a, he Sanctuary tlawh turte chuan Managing Committee hruaitute hriattir lawk hmasa thin turin mitin an ngen a ni.



## OIL PALM GROWERS

Kolasib District leh Mamit District Oilpalm Growers Assn hruaitute chuan Agriculture & Farmers Welfare Department Secy chu nimin khan a pisa ah an kawm a, he hun ah hian kuthnathawktuten Oilpalm rah an hralh apianga a man an dawn bakah NMEOOP scheme atanga sorkar laipui in a man a pek belh thin Viability Gap Payment (VGP) leh thil pawimawh dang an sawipui.

VGP hi Kum 2022-2023 ah la hmu velo farmer 152 te hmuh tur sanction fel tawh ni a hriat a ni a, chawlhkar hnih chhungin an rawn tihfel theih beisei a nih thu he hunah hian tarlan a ni a.VGP Oil Palm 2023-2024, 2024 -2025 ah pawh sanction tihfel nana Certificate ngaite Agriculture & Farmer Welfare Directorate, Mizoram-ah an dil mek thu Central Agriculture Ministry, Oilpalm Division hotute chuan an rawn sawi a, he Certificate hi Directorate lam pawh zawh nghal niin vawiin hian an thawn dawn niin an sawi ani.

Oilpalm rah phurhna Kawng (Link Road) chungchangah chuan tunah hian NESID atangin cheng Vbc 22 hmuh thuai beisei anih bakah Ministry of DONeR atanga beisei cheng Vbc 85 chu cheng Vbc 50 ah tihniam tura an rawn ngen angin tihfel thuai beisei ani tih tarlan a ni bawk.



## TUIRINI HEP SOCIAL IMPACT STUDY

Mizoram sorkar, Power & Electricity Department in Sesawng khaw thlanga Tuirini lui khuah a tum mek chungchangah mipui a a nghawng dan tur

**zirchianna neih mek a ni a. Nimin khan Thingsulthliah VC - II huamchhungah Vantlang Rorel inkhawm neih niin, kalkhawm ten Tuikhuah siam an remti.**

**He zirchianna hi State Institute of Rural Development & Panchayati Raj, Aizawl chuan a buaipui a, SIRD&PR atang hian Dr. K.T Pakhuangte, Asso. Professor leh Faculty dang te an kal a. Ngurthansanga, VCP, Thingsulthliah VC - II chuan a kaihhruai a. Vantlang inrawn khawmna bakah a ram neitute kawmin, mimal engemaw zat ngaihnan an la bawk a ni**

**<><><>**

**AIR NEWS ON SOCIAL MEDIA**

**Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.**

**Vawiin chawhnu dar 2 leh a chanve-ah Chanchinthar puan leh a ni ang.**

**<><><>**

**LABOUR CODE**

**Sawrkar laipui chuan nimin khan inhlawhfate tana dan thar labour code chu hman turin a puang a. He dan thar hian kum tam tak lo hman tawh labour law hlui chu awlsam leh huapzo zawkin a rawn siam dawn a ni. Sawrkarin labour code thar hman tura a tihte hi Code on Wages, 2019, Industrial Relations Code, 2020, Code on Social Security, 2020 leh Occupational Safety, Health and Working Conditions Code, 2020 te an ni a. Union Labour and Employment Ministry chuan kum 10 kalta chung khan social security huamchin a zau telh telh tih sawiin kum 2015-ah hnathawk thei a huamchin hi zaa 19 anih laiin 2025 ah chuan zaa 64 a huam tawh a ti a. Tuna code thar pali hman nih hnu hian hmasawna awm belh leh tura beisei niin social security hrang hrang an neih belh dawn bakah state leh sector hrang hrangah hlawkna zau zawk a thlen dawn a ni a ti.**

**Union Labour and Employment Minister Dr.Mansukh Mandaviya chuan heng insiamthatnate hi thil naran mai mai anih loh thu leh sawrkarin ramchhunga hnathawktute dikna chanvo a pekna tur anih thu a sawi.**

**Prime Minister Narendra Modia chuan Labour code thar chu ramchhunga hnathawkte tan hma hun ngaihtuaha an hlawkna thlen tur a ni a ti. Social Media lamah he thu hi tarlangin Pu Modia chuan heng labour code thar hmang hian ram eibar zawna pawh a chak lehzuol dawn a ni a ti.**

**<><><>**

**PM**

**Prime Minister Narendra Modia chuan ni thum awn G20 Leaders Summit hmang turin nizan khan South Africa Khawpui Johannesburg a thleng.Air Force Base Waterkloof ah ropui taka lo hmuah a ni a.**

**Pu Modia chaun khawvel ram hruaitute nen thil pawimawh tak tak sawihoa hun tha tak hman a beisei thu social media lamah a tarlang a. Prime Minister Modia hian SUMmit a a tel karlakah hian ram hruaitu hrang hrangte a kawm dawn bawk a ni.**